

kukia aliavilau miararumau

hlitakulukuluku miararumakuka, caalu mavacanguka ma aatua cacalua
hluhlungu hla sakurahlu, pasa'asia hlhlusa, 'asi'i uhlitaku, muraruma
vuvulunga, maruisana matisangalu kuli'i hla parihlatungu, papuhla aruamia
salia.

arupatakuavalisika, mamaini miararuma pasaulaula'u, takuaumumaka
ahlahlaina, hlimaluilipika hlamama, makalahlapa kiu'u, arupatahliasulu
arupakakari, tamuucuka cucumiararuma, alukacalai miaulusu, tam
mariavacanguaku, varatu maivuvurunga umalilupungu puaili salia,
umavalikia hlipusipia ina'ana.

ma ahla'amisana, mahluvarucu mumuka kiu'u vuvulunga, kuli'i hla
ahlamu mapapuhlika tavahlihla, ausi muruapihlihlika tapu'ai, ahlu'u, kuli'i,
marun tavuhlu'u tatavahlihla, taluavaulana ahlamacicia, arupakuavau tukucu
mahlukua sakurahlu, munana mutuvuku sahlumu, parakuka hlimipulatiku,
ucani taluavaulanana, rumikucucu 'umucumu langicaka matavuhliu
tahliaria, umanika hlhlali, ausicu pakiaturaa, paliatatalalu ihlaku, apuaili
salia ruvana, mililangicaka 'acangurahlu hla kiu'u, maliluhluvaisana
muruniana, ihlaisesa hliasasangaraku ucaniaari.

makahlamara umanika vasuvasu, ausi patakuamahlumahlungu, langica
sasaruana, patasuuru mangusipina, maialalangicu taluvaulu, pulauvicu
ihlahlamua matahluikutuku varatuna, marihlumu hlita'iaara tukutukua.
miaungucuka 'amisana, patakuacahlia ihlahlamu ta'iaara, ucani caihli
hlapahluailia, maialangu maritara'uhla, varu'u caihli pasangahlangahla
rumia. cucumacu hla miararuma ia, kuacahli maricikiri.

miararuma ia saliaisaka cucumacu, miungu ariari ihlaisesa ramii, kuucani
hliparana paumamainiau, hliparana arataisa hla mangusipi, uvura
miararumana, cucumau mahlatara, hla sitakuamia ahlama. marapihlika
cucumacu sipamiaisa micikiri miararuma, maci maru ucani aari, arakukacua
miararuma ia marahlupucua ramii tahlanata, miranguhlu mitarukakua
tunumuka cucutahlana, kuhlaisai, kukia ariacapacapangu malivilau
miararumau, tumuakia umaru paumahlungu tuku, maiatuhluhlu miararumau.

不要拋棄你的部落

部落四面環山，有小溪和河川劃界的美麗仙境。小孩相互穿梭部落嬉戲，婦人田裡務農，老人樹陰乘涼談天，部落人們和睦融洽。

部落是原住民永遠的家，是根，並不是只在那出生、生活和成長，部落提供傳統精神和文化生命。原住民為了理想和成就離開部落，如果有一天部落不在了，我們將是失了根的民族，漂在像海一樣的社會裡，所以，不要隨便拋棄你的部落。